



**James Minnesota United
nung denogo**

**Venezuela nung tepuokertem
chioktsü anogo atakzüksü**

Sorkari ANATG 2015 batch tesayurtem regularize asütsüla: RPP

Dimapur, February 7, 2026 (TYO): Rising People's Party (RPP)-i Nagaland sorkar dang All Nagaland Adhoc Teachers Group (ANATG) 2015 Batch pur regularize asütsü ayongzükogo.

Iba ken o süoki ia bilemstsüla aser mapang atsülanga moi tesayurtem regularize asütsüla ta RPP-i sangdong ka nung ashi.

2018 aser 2022 nung lungkak aitba sülen state sorkari high-powered committee (HPC) ka tentetsü aser mapang tatakzük ka tsüngda regularize asütsü nangzük ta ANATG-2015 Batch-i metetdaksüogo. Iba ajanga state sorkari nangzükba ama meinyakba sayur ta RPP-i ashi.

NPF-BJP teloktep sorkari ashioktsüba anema ANATG-2015-i tang lungkak aitba ya tim dang lir ta parnokisa ashi.

Tesayur aser kaketshir

meyirjang aika tarutsü dak sendakba tongtipang tebilemstsü ka kümsa küm atsülanga maotsüla. Sorkari aria mebilemstsüba aser tim mesüi inyakba ya tesempatsü mapa ka lir ta RPP-isa ashi.

"Sorkari mebilemstsüba ajanga tesayur tem küm aika timtema arur. Sorkari ketdangsübaren tajung indangbo jembir saka pei mapa inyakertem nem akhümtsübu aser tetushi agütsü nung dang ketdangsübaren tajungji tenzük" ta RPP-isa metetdaksüogo.

Ozüngi melaba ama lungkak aitba nung teloktemi adenshitsu, yimym ayimtsü aser memorandums agütsütsü temeten lir. Ibala inyakym ya sorkar anema inyakba ama mezüngshitsu aser bangdakpurtemi tamajung mangatetsüla ta RPP-isa ashi.

Karbi Anglong nungi 'foreigners' 3 meindok

Diphu, February 7, 2026 (Agencies): Karbi Anglong district administration-i nisung asem dang ghonda 14 tsüngda Assam aser India toktsür aotsü tetuyuba agütsüogo.

Foreigners' Tribunal (FT) kati bendangertem ta sangoktsüba sülen district administration-i par asem meindoker.

District Commissioner-i Immigrants (Expulsion from Assam) Act, 1950 nung Section 2 kübok iba tetuyuba agütsü. Tribunal verdicts ajanga parnok bendangertem ta sangokja liasü.

Par asem ya Manja Nadipar village nungi Md. Faizul Haque, Hidim Teron Basti nungi Md. Rafiqul Ali aser Jadav Rai Grant nungi Md. Fakaruddin nung lir.

Par asem dang ghonda 24 tsüngda Dhubri, Sribhumi mesüra South Salmara-Mankachar district tem ajanga Assam aser linük toktsür aotsü metetdaksüogo.

District administration-isa department ajak dang expulsion orders sülen anidaktsü tetuyuba agütsüogo.

Iba nung bendanger ta

jangjartem indang 'movable and immovable property' dena lir aser item rongsen sorkar ket nung agütsütsü metetdaksüogo.

District administration-isa bendangertem tenüng electoral rolls nungi agientsü, ration cards agientsü, Aadhaar cards sota ayutsü aser government welfare schemes o social security benefits ajunga agientsü tetuyuba agütsüogo.

Assam sorkari tribunal verdicts mapa küma inyakar aser iba asoshi district administration tem dang Immigrants (Expulsion from Assam) Act, 1950 kübok mapa inyaktsü tetuyuba agütsüogo.

2025 küm tom ka nungi Assam nung foreigners ta jangjartem nem iba mesükba notices agütsüogo.

State sorkari 1950 Act nung ajemdaker özüng alema arurtem maittsü jangjaba aser meyipa yokba maparen mapang agiba legal process ajanga masü saka tekaraba nung inyaktsü ta Assam Chief Minister Himanta Biswa Sarma-i sangoktsüba sülen nungi iba amaji inyakar arur.

NLA Speaker-i BAC senden ayonger

Dimapur, February 7, 2026 (TYO): 14 buba Nagaland Legislative Assembly indang Tibuba Session asoshi Provisional Programme renemtsü senden ayongzükogo.

Nagaland Legislative Assembly Speaker aser Business Advisory Committee (BAC), Chairperson Sharingain

Longkumer-i February 20, 2026 anüngdang 12:00 ako nung senden amentsü metetdaksüogo.

Sendenji C. Chongshen Committee Room, Assembly Secretariat nung amentsü aser March 2, 2026 nungi tenzüksü aliba Assembly Session atema Provisional Programme renemtsü.

FNT ya state balaka akümtsüba nung mezüngbuba mera lir: ENPO



A. Chingmak Chang

Dimapur, February 7, 2026 (TYO): Frontier Nagaland Territory (FNT) agreement sign sütepba ya state balaka akümtsüba nükjidong nung mezüngbuba mera agiba lir ta Eastern Nagaland People's Organisation (ENPO)-i metetdaksüogo.

February 5, 2026 nü New Delhi nung Eastern Nagaland People's Organisation (ENPO), Nagaland sorkar aser Ministry of Home Affairs (MHA) tsüngda Frontier Nagaland Territorial Authority (FNTA) tentetsü atema tenangzüktep agia liasü.

Honibarnü Konyak Morung nung ENPO telok pelashishia agizükba sentong ka nung ENPO

president A. Chingmak Chang-i o jembidang iba tenangzüktep nung sign asüba ya tatembang masü saka ketdangsübaren maparen tenzükba lir ta ashi.

Terenlok angutsü atema kin tiprong kati ka yaritepa noktaksüla aser külemi inyaktsüla ta pai ashi.

"Iba otsüsütsü tenangzüktep sign sütetba atema Eastern Nagaland nung alir senso shiai tenüng agitsü. Eastern Nagaland nung aliba kin ajaki asen litsü nung tarutsü ketdangsübaren asoshi longjemtsü mepishir" ta Chingmak-isa ashi.

Iba tenangzüktep ya ENPO-i akhangba masü saka India sorkari

agütsüba lir kechiyong iba ya Eastern Nagaland nung alirtem taginübatem den putepa lir ta paisa ashi.

"Iba tenangzüktep kübok Eastern Nagaland asoshi senotsü aser terenlok teyari MHA nungi indangindanga arutsü. Iba maparen tenzükba aser inyaksangshia aoba reprangtsü atema Centre, state sorkar aser ENPO külem committee ka tentetsü" ta paisa ashi.

FNTA ya principal secretary mesüra additional chief secretary ka lenisüba kübok mini-secretariat ka ama inyaksangshitsu. Iba asoshi Governor-i ENPO den asüngdangtepa interim setup asütsü ta Chingmak-isa shisem.

Iba maparen ya Nagaland state sasep nung asütsü anungji tanüngba Naga kin ajaki Eastern nübortem ajungkettsü asoshi yariteptsü mepishir ta Chingmak-isa metetdaksüogo.

ENPO teshimtet telok pelashishia agizükba sentong ya Eastern Nagaland Peoples' Union (ENPU) Dimapur, ENPU Kohima aser ENPU Chümoukedima yaritepa ayongzük.

Dzükou Valley nung Tripura nung lanur mang nguogo

Dimapur, February 7, 2026 (TYO): Hokolbarnü Dzükou Valley nung Tripura nungi arishi küm 22 tain Pranab Das indang mang nguogo.

Das ya Srinagar district, Tripura nungi liasü aser January 4 nü pa Dzükou Valley-i ao saka idak nung jagi meyipa maru.

January 13 nü pa samaba osang angazükba sülen Kohima Police, district administration, disaster management authorities, Southern Angami Youth Organisation (SAYO) aser tour guides joint search operation tenzükba liasü. January 13 aser 16 tsüngda kanga meranga bushitepaka Das mengutet.

Hokolbarnü Jakhama yimdak nung lanurtemi morok mi

reprangtsü atema aodang Das indang mang ayongküm nung aliba angu.

Iba osang angashir Kohima Police, SAYO, aser Khuzama, Viswema, Jakhama, Kigwema o Phesama nungi lanur volunteers-i pa mang bener arutsü atema ao.

Aonung piyong pa mang bener arur Honibarnep vehicle stop point atong aser idakji sarasadem sentong ka agi. Idangji SAYO aser Viswema Village Council züngsemtemi asür nem akhüm tetushi agüja Lohe (traditional Angami shawl) ka abenloktsü.

Pranab Das indang mang Kohima police station morgue nung yua lir aser par kinungertem Deobarnü tonga arutsü imlar ta PRO-isa ashi.

Pa kechi agi asü ano mejangjateter kechiyong Tripura nungi par kinungertem tonga aruba sülen ang post-mortem examination agitsü ta ketdangsürtemi ashi.

Pranab Das ya January 2, 2026 nü Kohima-i aru aser Lerie colony nung homestay ka nung tesüsabuba angu ta Kohima Police-i metetdaksü.

Das-i January 2 nü homestay nung anenzük aser January 4 anepdang yakta toktsür ao. Kasa anogo pai Viswema entry point nungi Dzükou Valley-i aotsü asoshi entry ticket ka meshi ta police-isa ashi.

Pa mang anasa Pranab Das tenüng nung Dzükou Valley entry slip ka, mobile handsets ana aser brown wallet ka ngutetogo.

NSF-i lungkak aitba sota atar; HPC den jembishinütsü

Dimapur, February 7, 2026 (TYO): Health & Family Welfare department kübok medical officers 97 regularise asüba anema lungkak aitba ajak anena atatsü aser state sorkari tentetba High-Powered Committee (HPC) den jembitsü lemtet agiogo ta Naga Students' Federation (NSF)-i metetdaksü.

Honibarnü NSF 2nd emergency presidential council meeting nung iba lemtet agi. December 20, 2025 nü NSF-i

state sorkar nem mapang züngzüksüba tembangba sülen iba rongdak senden ayonga amen.

Nagaland Cabinet-i February 3, 2026 nü regularisation orders sota atatsü aser HPC ka tentetba reprangshimdaksütsü lemtetba agizükter ta NSF-i ashi.

Iba ken o angatetteptsü asoshi NSF executive council nem HPC den jembishinütsü tashi agütsüogo ta NSF-isa metetdaksü.

Mapang züngzüksüba tembangaka lungkak aitba sota

atar ajisüaka NSF units ajak kümküma atatsü aser olemtep tamakok ngura inyaksangshia aotsü atema renema atatsü metetdaksür ta parnokisa ashi.

Senden nungsa health workers-i public health aser welfare atema aser talisa Covid-19 wara mapang mapa tajung inyakba atema tenüngsang agütsüogo ta NSF President Mteisuding Heraang aser General Secretary Kenilo Kent nati sangdong nung metetdaksü.

PHED-i Shamator District nung Jal Arpan Diwas agi



Dimapur, February 7, 2026 (TYO): Public Health Engineering Department (PHED), Tuensang-i February 6, 2026 nü Chessore Village nung aser February 7, 2026 nü Sangphur Village nung Jal Arpan Diwas takok ngua agiogo.

Tang teinyakdak Jal Jeevan Mission (JJM) maparen kübok Shamator District nung iba sentong ayonga agi.

Iba sentong ya Junior

Engineer Er. Lanu ketdangsüba kübok agi aser JJM-ISA, Tuensang Division-i Alongphi Welfare Society den yaritepa agi.

Iba sentong nung Village Council, WATSAN Committee, Water Quality Monitoring and Surveillance (WQMS) team, FTK users aser tetsür züngsemtemi shilem agia liasü.

Maneni, training session ka agidang Field Testing Kits

(FTKs) amshia water quality testing asüba sayua liasü.

Maneni, sentong nungsa rural drinking water supply system indang operation and maintenance (O&M) sayu.

Maneni, yimdaklirtemisa Jal Jeevan Mission sangdong aser tezüngzüktep agia liasü aser idangkji parnoki water quality kumzüka ayutsü, mapang shia tendangtsü aser külemi ajak asoshi drinking water system anepalutsü nangzükogo.

Kohima nung coaching center ajak register asütsü tuyur

Dimapur, February 7, 2026 (TYO): Kohima District nung District Level Committee for Registration and Regulation of Coaching Centres tentetogo anungji February 10, 2026 matongdang coaching centres ajak registration asütsüla ta Kohima Deputy Commissioner B. Henok Buchem-i ashi.

Kohima District telongtet

nung aliba coaching centres ajaki registration asütsüla aser Kohima Deputy Commissioner office nung application form angutsü ta paisa ashi.

Tuition, study programme mashii ka atema kaketshir 20 den tema nem tesayuba agütsüba, competitive examinations mesüra academic support agütsüba reju mesüra coaching centre ajaki

registration asütsüla ta "Guidelines for Registration and Regulation of Coaching Centres" nung lateta lir.

Coaching centres kar kongsang aika lira, kongsang shia coaching centre balaka ta züngshitsü aser kongsang shia atema application balaka agütsütsüla ta Kohima Deputy Commissioner - isa metetdaksüogo.

Assam Rifles-i New Jalukie aser NHAK nung nübortem yari



Dimapur, February 7, 2026 (TYO): Assam Rifles-i Peren District kübok New Jalukie Village nung alir nem teyari tulu agütsüogo.

Assam Rifles-i village infrastructure tajungba akümtsü asoshi Earth Moving Plant (EMP) ka agütsü.

Iba Earth Moving Plant ajanga yimtsüng nung lenmang anasa drainage improvement maparen inyaksü.

Iba mapa ya tzüngluruwa mapang tzü junga ayimtsü, tzü matsüngtsü aser

lenmang meraksatsü atema inyaksü.

Assam Rifles-i teyari tulu agütsüba atema yimdaklirtemi tenüngsang agütsüogo.

Maneni, Assam Rifles-isa Naga Hospital Authority Kohima nung cancer agi shiranger tanur ka nem azü tenla agütsüogo.

Arishi küm 5 tain tanutsüla ya Acute Lymphoblastic Leukemia atema anepalur aser platelet aser blood transfusion kanga nungdaka liasü.

NHAK blood centre nungi

rongdak nungdak temepishiba anguba sülen Assam Rifles personnel-i azü tenlatsü mulungteta agütsü aser iba ajanga taküm kumzükogo.

Hospital nung ketdangsürtemi Assam Rifles ajanga mapang shitak nung teyari agütsüba aser amalitep aliba atema tenüngsang agütsüogo.

Iba mapa ajanga Assam Rifles-i civilian welfare asoshi tenangzükba yur inyakba aser "Sentinels of the North East" shilem agiba sayur.



**OFFICE OF THE
MOLUNGYIMSEN SENSO MUNGDANG**
Telongjem Nung Terenlok
P.O - Tuli, Mokokchung : Nagaland - 798618

SENSO LENLA MUNGDANG

Tetushi külem tenzüker aser züngsem tajung, tamasa Tsüngrem temeim salem abener.

Kanga rongdak teinyaktsü maparen alinung, Molungyimsen senso lenla mungdang **14th Feb 2026** (Saturday) **anogo 10:00 AM** Molungyimsen yimkong kilang nung sentepa mensem akatsü sangdonger.

MSM Sanen Luden, Arogo Otsü Special Committee, Tzü Ali, Yimjung committee, jili mensem **13th Feb 2026** (Friday) nikongdang **5:00 PM** nungi tenzüka, MSM kimen kidang amentsü.

Anungji yimdak aser bendanglen alir senso ajak süngpu zünga nungi tema ajak iba mungdang nung adentsü metetdaksü.

Madenertem telok lemtet agi merenshitsü.

Senso mungdang mapang bendanger shinga yimtsüng telong nung alitsü memelar.

Sd/-
N. Joseph Lemtur
Tir MSM

Sd/-
Imsuinba Jamir
Tongti Zülur MSM

SANGDONGER

Mr. Moasosang Jamir (Longkong) S/o Lt. Chubamangyang Jamir, pai sen-o-tsü apuba aser ki, kimong ali jaman dak sendakba maparen kecha khuret onok adianu aser kinungertemi mabener aser memetet ta sangdonger.

Kinunger aser adianu tenung nung

1. Toshinungba - 9856882634

2. Imsüba - 8731923397

Longleng DPDB senden nung FNTA lemsatep

Dimapur, February 7, 2026 (TYO): February 7, 2026 nü Longleng District Planning & Development Board senden nung Frontier Nagaland Territory Authority (FNTA) osang lemsatepogo.

Senden nung menden Longleng Deputy Commissioner W. Manpai Phom, NCS-i tesentepertem pelaa agizükdang Eastern Nagaland People's Organisation (ENPO)-i anir India sorkar aser state sorkari February 5, 2026 nü FNTA tenangzüktep agiba osang lemsatep.

"Iba tenangzüktep indang osang tejangja mali saka ketdangsürtemi mapa inyaksü renemteper. Anungji Eastern Nagaland nung aliba ketdangsürtemi tenangzüktep nung lateta aliba mapatem inyaksü atema renema atatsü ayongzüker. Asenoki mapa shitak meinyakra maparen ajak amajok akümtsü" ta Deputy Commissioner Manpai-i ashi.

Küm ka tsüngda interim body

ka tentetsü imlar anungji Heads of Departments (HODs) aser Officers-in-Charge ajaki meranga inyaksü nenshir ta paisa ashi.

DC Manpai-isa tesentepertem dang Union Minister of State for Agriculture & Farmers Welfare-i tan ita district semdangtsü osang lemsatep.

Iba atema department ajak aser talisa Agri. & Allied departments-i olemtep atema renema atatsüla aser PowerPoint presentation ajanga departmental maparen lemsateptsü renemtsüla ta paisa ashi.

Iba senden nung Bautung Government Higher Secondary School Principal aser District Hospital, Longleng Medical Superintendent nati board den report lemsatep.

Maneni, department of Horticulture-ia parnoki district nung maparen inyakba indang osang lemsatep.

Taruba DPDB senden nung department of Agriculture-i osang lemsateptsü atema DC Manpai-i mapa lemsateptsü.

Wokha SP-i Tenant Registration App indang metetdaksü

Dimapur, Tsüklai/February 7(TYO): Wokha Superintendent of Police office sangdong ka ajanga, Inner Line Permit (ILP) inyakyim akangshitsü, benoka inyaksü aser asadanga alitsü asoshi Nagaland Police-i yangluba Tenant Registration App amenokba metetdaksüogo. August 14, 2025 nü osang agütsüba sülen tang iba jenjang ya agiogo.

Iba App yagi OTP-based verification ajanga taah agütsür aliba kidang alirtem digital registration asütsü asoshi teyari agütsür. Ki kiburtem mobile number verification amshia iba App ajanga züngoksemtü nungdaker.

Tenant tem parnok züngoksemta inyakyim tembanga inyaksü asoshi ali kibur nungi OTP ka nungdaksü aser kibong ka nung kinunger kwi ali iba dak ajemdaker co-tenant tem benenloktetsü.

Tang benoka aliba ILPtemzüng özüng kübok tenant aser co-tenant temi parnok indang osang tejangja benoktsüla aser kuli kakat

agütsütsü asoshi ali kibur khuret asütsü. Kidang alir melenshiba mapa tenüng agintsü aser benenloktetsü atema ali kibur asoshi provision lir aser iba ajanga pei kidang alirtem osang tejangja agütsür.

Tenant Registration App ya ILP regulations shitak benoka inyaksü, nüburtem tali tekümzüka kübok toktsütsü aser tenant aser co-tenant tem indang digital record shitak ayutsü atema design süa yangluba lir. Iba App ya Nagaland Police official website (<https://police.nagaland.gov.in>) aser Google Play Store nung angutsü.

Lisopur, ali kibur, tenant,yimtsüng aser colony chairmen aser lokti lenirtem dang nüburtem kumzüka toktsütsü, temzüng özüng shitak benoka inyaktsütsü aser iba inyakyim anep anepa benoka inyaksü asoshi teka amteper inyatsü mepeshia metetdaksüogo. Teyari nungdakra ali kibur aser tenant temi pei police station semdangtetsü.



February 07, 2026 nü Ato kilonser, Narendra Modi Kuala Lumpur, Malaysia tonga aoba mapang Malaysia Ato kilonser, Anwar Ibrahim-i pa agizükba sülen Modi-i tanurtem dak teka ayiploksüba noksa nung angur.

NCP (SP) lenir Pawar-i tayimtsü tsükokba osang tejangja metetdaksütsü

New Delhi, February 07 (Agencies): Honibarnü NCP (SP) lenir Rohit Pawar-i, Maharashtra deputy chief minister Ajit Pawar densema nisung pongu tsüksetba tayimtsü lendong atalokba osang tejangja pai February 10 nü metetdaksütsü, ta ashi.

Iba tatalokba nung tasüngdangba aser teratatsü aika lir; Mumbai nung osangbenertem den jembidang pai iba osang tejangja metetdaksütsü, ta pai ashi.

Honibarnü Baramati nung Zilla Parishad elections nung vote agütsüba sülen osangbenertem den jembdiang Rohit Pawar-i, "Nisung ajak melungjang nung tasüngdangbatem aser teratsü aika lir. Kechiba tayimtsü tsükok, aser kechi ajanga iba lendong ya atalok. Item onüktemji ni February 10 nü metetdaksütsü," ta ashi.

Maharashtra nung Zilla Parishad aser Panchayat Samiti elections Honibarnü agiogo.

Tayimtsü tsükokba lendong nung Ajit Pawar asüba ajanga iba election anogo atsülanga liasü.

Pune district kübok Baramati nung Learjet tayimtsü tsükokba lendong nungji Ajit Pawar densema nisung pongu asü.

Rohit Pawar-isa, Ajit Pawar-i Nationalist Congress Party telok ana longjemnüa liasü, aser iba atemaji parnoki maneni inyakdar, ta metetdaksü.

Zilla Parishad election nung Sharad Pawar-i aniba NCP (SP) aser NCP nati longjemer tokatepogo. NCP candidate temi 'clock' maitsü amshia toktep.

"Ajit-i kibong ka ama ajak longjemnüa liasü. Tanübo ajaki longjemer toktepogo. Pai party ana loktepnüa liasü aser onoki maneni iba atemaji inyaksü," ta pai metetdaksü.

Tayimtsü tsükokba sülen West Bengal chief minister Mamata Banerjee-ibo, Ajit Pawar iba lendong nung asüba ya yimtenren tsütsü asalentong tamajung ka ajanga asütsüa akok, ta shia iba tatalokba ya Supreme

Court-i ketdangsüa bushisüngdangtsü takhangba agüja liasü.

Iba tatalokba bushisüngdangba dak sendakba nung Union Minister of State for Civil Aviation Murlidhar Mohol-i, Aircraft Accident Investigation Bureau (AAIB) aser Directorate General of Civil Aviation (DGCA) nati iba tatalokba kanga keraa bushisüngdangdar, ta metetdaksü.

Mohol-i, "Tayimtsü nung aliba black box nguogo aser AAIB team o DGCA nati ibaji bushisüngdangdar. Black box nungjagi data ji download asüba sülen ibaji asadangtsü. Iba sülen bushisüngdangba mezüngbuba shilem metetdaksütsü," ta ashi.

January 28 nü tayimtsü tsükokba lendong nungji Ajit Pawar den pa indang body guard Vidhip Jadhav aser flight attendant Pinky Mali na, pilot Captain Sumit Kapoor aser co-pilot, Captain Shambhavi Pathak nunger asü.

Islamabad nung bomb amshia mosque amakba India-i aitsür

New Delhi, Tsüklai/February 07 (Agencies): Islamabad nung bomb amshia mosque amakba sülen India-i iba tatalokba aitsüba den külemi takoksa angur kibongtem den mangyim jashi lemsatepogo.

Pakistan-i iba lendong atema India aitsü aser iba dak sendakba nung India-i Pakistan dang, tangar nem tai tongloksütsü melenbo pei linük telung nung tebilemtsü onüktem ang

bentettsü atema inyakang, ta metetdaksü.

Ministry of External Affairs-i sangdong ka ajanga, "Islamabad mosque nung bomb lendong atalokba India-i sashia aitsür aser iba lendong nung asürtem atema mangyimer. Loktiliba nung tebilemtsü onük balala atema inyaksü melen pei linük nungi adokba lendong atema Pakistan-i tangar nem ang tai tongloksüba ya tia maka. Iba ama tai

tongloksüabaji India-i magizüker aser tajemdakdak kecha mali," ta metetdaksü.

Hokolbarnep Islamabad nung Tarlai Kalan kiyong nung Shia mosque ka nung bomb lendong atalok aser iba lendong nung nisung 31 asüba den nisung 160 dak tali yiru.

Khadija Tul Kubra Mosque nung security sepaitemi parnok nokdangba sülen nisung kati mosque kima bomb ji pokdakja liasü.

Canada nung India nunger kaketshir 17 tepset

New Delhi, February 07 (Agencies): 2018 küm nungi tenzüka 2025 küm tashi nung Canada nung India nunger kaketshir 17 tepsetogo, ta sorkari Parliament nung metetdaksü.

Lok Sabha senden nung AIMIM MP Asaduddin Owaisi-i asüngdangba langzüdang Minister of State for External Affairs Kirti Vardhan Singh-i, 2018 küm nungi 2025 küm tsünga bendanglen India nunger kaketshirtem teimba tepsetbaji Canada linük nung liasü, ta ashi.

Singh-i, linüktem sasep nung 2018 küm nungi 2025 küm tsünga Canada nung India nunger kaketshir 17 tepset, United States nung 9 tepset, Australia nung asem tepset, Kyrgyzstan nung ana tepset aser United Kingdom, China, Denmark, Germany aser Grenada shia nung India nunger kaketshir kaka tepset, ta metetdaksü.

Owaisi-i, bendang linük balala nung India nunger kaketshirtem kanga bulua tepsetba ya sorkari meteta ali asü? aser item tatalokba

mapang shidak nung bushisüngdanger asü?, ta asüngdanga liasü.

Singh-i, "Bendanglen India nunger kaketshirtem ajak kümzüka alitsüji sorkar atema tongtibang aser kaketshirtem anema inyakbaji sorkari mita repranger. Item ama tatalokbaji Indian Missions aser Posts-i item linük ketdangsertem matsüngdang benoker aser jungjunga bushisüngdangba sülen aibelenertem pua temerenshi agütsütsü atema inyaker," ta ashi.

Paisa, Indian missions-i mapang shia kaketshirtem den tongteprateper aser linük tonga arudang mesüra arutsü lia parnok nem tekümdangtsü osang balala metetdaksür, ta ashi.

Minister-isa, "Mapang shidak nung nungita yaritsü atema Indian missions nung register asütsü onoki kaketshirtem ajungshir aser MEA indang MADAD portal, WhatsApp groups, consular camps, open houses aser emergency helplines amshitsü ajungshir," ta metetdaksü.

Muslim nungeri kodanga Hindu nütsüng majangtettsü: Owaisi



Asaduddin Owaisi

New Delhi, February 07 (Agencies): AIMIM Tir, Asaduddin Owaisi-i, India nung Muslim nungertemi Hindu nütsüng ajangtettsü ta jembibaji tai aser iba ya yimtenren tsütsülen nungi jembiba o lir, ta ashi.

Telangana nung municipal election agitsü lia Nizamabad nung lokti senden ka nung jembidang Hyderabad nungi MP, Owaisi-i, Muslim nunger nütsüng kanga arener ta aikati jembia shisabulur, ta metetdaksü.

Tawa Rajya Sabha nung Ato kilonser Narendra Modi-i jembiba o dak sendakba nung Owaisi-i, Ato kilonseri alima tesem aika nung kanga tain nütsüng teimba aliba mapang nung India nungbo lanur nütsüng teimba lir ta jemiogio, süra item lanurtem atema sorkari kechi inyaksür?, ta asüngdang.

Owaisi-i, "Linük nung nütsüng shilem 60 bo arrshi küm 40 ser tekübokpurtem lir, süra parnok nem mapa agütsütsü atema pai (Modi) kechi telemtetba agia inyaker, aser lanurtem nem kechi skills

training agütsür?" ta asüngdang.

Owaisi-isa, Muslim nunger anema nütsüng arenba atema kanga jembiteper, ajisüaka rongsenkettzüng tsütsü tebilemtsü onüktem atemabo meinyaker, ta ashi.

Owaisi-isa, "Küm 20 nungbo item lanur nütsüng ya tain akümtsü. Jenjang koma atutsü aser sen kwi indoktsüsa akümtsü, ta asenoki meshisadanger. Ajisüaka parnoki, Muslim nütsüng kanga arener ta jembir. India nung Muslim nunger nütsüngi kodanga Hindu nunger nütsüng majangtettsü. Küm 25-30 nungbo linük nütsüng tain akümtsü ta tangbo parnoki angateter. RSS tongti Mohan Bhagwat-i tanur asembose asotsü ajungshir. Ajisüaka paibo yamaji meinyaker," ta metetdaksü.

Owaisi-i, nütsüng kanga arenba azüoktsü atema ozüng ka benoktsü asoshi tamalen o kanga entepa aruogo aser o entepba mapang nungji Muslim nunger anemasa jemiogio, ta metetdaksü.

GOVERNMENT OF NAGALAND
DIRECTORATE OF HEALTH & FAMILY WELFARE
NAGALAND:KOHIMA
NO.DHFW-21/FSSA/WP(MoU)/HR/53/2025-26/60-63
Dated Kohima the6thFeb'2026

NOTIFICATION

In pursuance to this office advertisement NO.DHFW-21/FSSA/Workplan(MOU)/15 dated 21st Jan 2026, which was advertised through local dailies on 23rdJanuary 2026.A walk-in-Interview for filling up the following posts under Workplan (MoU) 2025-26 of Nagaland Food Safety Project, shall be held at Directorate of Health & Family Welfare (DHFW), Kohima, on the10th& 11th of February 2026from9:00 AM.onwards.

Sl.No	Name of the post	Date and Time of Interview.
1	Food Technician (FSW) & Candidates who have applied for both Food Technician (FSW) & Food Safety Officer (FSO) Post	10 th February 2026 9:00 A.M
2	Food Safety Officer (FSO)	11 th February 2026 9:00 A.M

Reporting time: 8:30A.M.
Venue: Director (Family Welfare), Official Chamber, DHFW,Kohima.
*Note: 1) Any kind of canvassing by the candidate,shall lead to disqualification.
2) No TA/DA is admissible for attending the interview.

Sd/-
(DR.MERENINLA SENLEM)
Principal Director & Addl.Food Safety Commissioner
Directorate of Health & Family WelfareNagaland:Kohima.



TIR YIMYIM YIMOBILEM (EDITRIAL)

DIMAPUR SUNDAY, FEBRUARY (TSÜKLAI) 08, 2026

Asükümi anizüker

Nisung tajung ka raksatsütsüba jakla tamajungtem rongnung asükümba ya ka lir. Talisa, Khristan taküm asoshi asüküm ya tsükchir tuluka lir. Iba yagi Tsüngremi memulungba inyaksü ajungshir aser nisungtem den putepa melidaktsür. Asükümi nisung ka pasasa pa dang nungi tuluba bilemdaktsür aser azükaru masütsüba lenmangi anir. Tsüngremi Adam o Eve na alima nung kibur süa jangratema lidaktsütsü asoshi yanglu. Tena asoshi timtem aser tekangshi kecha mali asü. Tena taküm alitsü asoshi asentzü sena belemseta mapa inyaksü kecha nüngdak mali asü. Tena asoshi shisabolu aser tetsübu kecha mali asü. Ajisüaka, kodang tenati asüküma Tsüngrem mesüka akümtsü merang, iba asüküm jagi tena Tsüngrem mesükba nung jangratema shisamebului alitsüba temaba jenjang nungi timtem madak timtem ajurua belemseta inyaker külenang chiyongtsüsaba teküpbok jenjangi anizük. Iba tatalokba ya asenoki Lipok tapu 3 nung shia angutsü. Aji oda, asen tsüraburi ken asüküma bilemba agi Tsüngrem mepelaba ajanga tanü tashi iba atakatem jenjang nung asenok alir. Tasütsü lia kanga mepishiba agi, Tsüngremi Hezekia chuba nem arishi apuloktsü aser shirang aneptsü. Iba jagi pelakanger, ajemalua Tsüngrem tenüng sanga pai mulungba asüngdanga inyaksü melen, Hezekia chuba asüküma adokba otsü ka asenoki Isaia tapu 39 nung shia angur. Pai pa akaba ajak pa tsükchirtem dang sayua adok. Babilon chubai pa dangi shidi aser sempet bener yokertem dang Hezekia-i mesayuba kecha par kidang aser par yimli nung maliasü. Ashiko, Babilon chubai züluba shidi nungji Hezekia chubaji kanga akümtsüba aser ajungketja zülua liasü südi. Aji oda, shidi dang masü saka ano chuba kati chuba ka nem agütsüba sempetji komaka tulu aser tajung ser alitsü. Item o tajung aser sempet jagi Hezekia asüküma bilemdaktsü aser iba asüküm jagi pa akaba senti rongsen ajak par tsükchirtem dang sayu. Iba asüküm taaji Hezekia asoshi ayatai ta asütsüsa ka liasü. Ashiko, iba mapangbo pai Tsüngrem dang arshiang memeshilok tajungba süla ta sasasete bilemer asütsüa akok. Hezekia chubai tangar tsükchir tsüngdang ken asüküma inyakba ajanga, pai sayuba senti rongsen ajak kecha anünga meyutsüi ajak par tsükchirtemi Babilon bener aotsüsa aküm. Hezekia asükümba ajanga Tsüngremi pa teküpbok jenjangi anizükbaji aji tatem masü. Ajisüaka, pa dak nungi jazükba jabsotem ajak teyangluba nisung kümer Babilon chuba kidang tenzüksü. Asükümba ajanga temaba jenjang nungi tangari mezüngmeshitsüsa teküpbok jenjangi anizükbaji ibaji lir. Asükümba temenen shisatsü nungi Yisu nütsüngtema mejenbutet. Parnoki parnoksasa peiang tuluba ama bilem, anungji asükümtepa parnok rongnung shiba tulutiba ta toktepa jembitepa asenoki Luke tapu 9 nung angutsü. Asükümba ya kenken talang nungi aruba tsükchir ka masü, saka yabo asenok den teti lir, anungji asenoki ibaji azüoktsüla. Aji oda, iba ama temenen azüoktsü asoshi Tsüngremi Kain dang ashiba o ka Lipok tapu 4: 7 nung shia angutsü. Nai na mazüoktetba ajanga nisung kar jashidaktsüba nai meteta lir, saka nü dak asüküm aliba jagi tangar dang taidok meshitsü nokdangtsü, nai na nisung kar den meputepi aliba putepnütsü saka asüküm shisatsü jagi nü dang nung ta ashitsü, nai nü temenen meteta lir aser aji nangzükner, saka asükümba temenen jagi aji nokdangtsü, nai nü taküm libaliro aser achiajemba yimya melenshiner saka nü dak aliba asüküm shisatsü jagi aji memelenshidaktsütsü. Nai tangar tenzüksü aser tangar dang tajung inyaksü meteta lir, saka asükümi ibaji meinyakdaktsütsü. Item tajungtem melenaji, asükümi teti naji nüsasa Tsüngrem mesüka jenjang temaba nung alitsü ajungshitsü. Teti na tangar dang nungi temaba asütsübaji asükümi ajungshitsü. Asükümi tangar dang awashi metettsübajia temenen amato bilemdaktsütsü. Ajisüaka, Apijemtsü Shin 29:23 nung ashir, " nisung ka asükümi pa teküpbok jenjangi anizüktsü, saka ajemalubai tetushi angutsü. Asükümi asenok atidangdang, Adam, Eve aser Hezekia taküm otsütem bilemtetdi aser ajemalua alitsü asoshi Yosef taküm otsü ajanga asenok ajungshidaktsüdi.

OLEMSABANG

"MANOKSHIBA LUNG

~ Sakurepla Longkumer

(Iba Yimdangjem otsü ya Tir Yimyim aser Bookipedia nati ayongba toktep nung shilem agirtem)

(Yashi adok nungi...)

Amitsür kibong nübur tsüngdang tatishitsü keta litetba kibong ka to temeimtsüka temang aser temulungjang nung tarak mesemi bener nükrangdong kibong to bala luyatsü tensa kati aru. Ashilai balatsübaji khenyongi memulungi alibato tanübo kinunger adianutem jateper balatsü o jembitsü osang yok. La asoshi balatsü telemtetba agibaji, kinungboi tangar tetsür anishiba agi masü mesüra la dak azükbajia masü saka la tenük agi ngua la zü agi akümba tanur asem tebui mapayui azükbaji lai temulung agi makok. Ashilai lar kibong raksaba aser chirnur mabensai alibaji tajungba kechiaser külemi alinungbo tebui tanur asem dak azükba jagi tashitak tamajung kaotsü aser tasüa asütsü ta tsübuba yong lai Medemba den malitsü shisatet. Kinungtsü kinungbo anatsülen nungi kin kidong aser kinungertem senteper jembidang, Ashilai joko Medemba den malitsü ta ashi aser tanur asemia tsürabur balaluya asüyonga tetsü asütsü aser tebu asütsü saka par asembo tetsü den dang alitsü ta ashi. Kin kidongi Medemba kanga artsü aser parnoki küla melenshiteper alitsü dang ajungshir senshi. Saka kodang ajak senshir aonung aru, Medemba to akhi ama kimai ao aser yi jemer aruagi ku renemer pa joko Ajungla den kibong tasen ka aser tajungba ka yangertsü ta shir kidang nung ayazüka ao. Temeimtsüka Taochi-i anir tenu ana aser tetsü temulung shiranga par pezü azüiter jeptepba iba aonung süidaktsü. Alima nung tasüba agibo mepila sürnung amitsür süa alitsüji Ashilai yimdangia marui liasü. Medemba joko Ajungla den pelaseta kibong tasenji tenzüka kinü tanurji aruyongyaa atadang, külen pai toktsüba kibongbo auyi agia memeyongba taküm ama alashia yipru mopung tuluji bener Taochi tetsüi tanur asemji anir teraksa kibongji tenzüksü apuso. Kechileni aotsü aser kechi agi chiyunga alitsü memetet saka Ashilai Tsüngrem dak tali dang azüit aser tamang kaa tebu maliba kibongji tenzüka aotsü la tasü itshir noktak. Tanur asemi tebu kanga sempaa aküm aser iba taku marokji bener par asem college-i ai. Tetsüi teti tanur asem dang kechi tensa arudir aruaka, tebu mamadoktsü aser mesempatsüba shiaka, par asemi tema nung tetsüi ashiba oji hai ta agizük saka temulung nung tebui parnok toktsür aoba tejashi kodanga mamadoki liasü.

Alima nung dang alir asünung Taochila aser tenu ana tangari amitsür chir ta jaa mezüngmeshi aser kariibo tebu azüi akümba chirtemji parnoka tebu ama dang alitsü ta shia par asem nungi pila ali. Tanur asem asoshi anogoshia ali tongpang raraji ulura liasü saka kodang parnoki tetsü tejak nung ranglokdir, tetsü khuretang tuluba liasü. Nüburtemi Ashila dak ariabilemba dang nungibo mezüngmeshi tuluba liasü. Yamaji mezüngmeshia o tamajung shiaka khenü danga Ashilai itemji temulung nung mayu aser tanur asem danga atangji amitsür chir asübai yamaji ajarba dang anungji odang aremzüksü aser Tsüngrem dak dang metaloker alitsü teti ajungshi. Tanur asemi tetsüi ashiba o nungi kodanga mepila aser par asem takümüji Tsüngrem dak tera yanga lanur tajung ka ka ama ali. Tanur asem mesütsü kinungertemi yariaka, kinungertema pei pei kibong khuret peria dang ali asünung, Ashilai kinungertem kisüng dak metaloker mali saka lai tzünglu aruaka aser anü tashi agi puaka, takar lu nung anogoshia tangari meinyaknüba mapa inyaka anogoshia noktak. Sen 500 atema la belemba mesasai tanur tem tajung kümdaktsünü dang Ashilai la taküm ajak agi meranga inyak. Aor sobaliba nung balaluyaa tsürabur anaji piladok nunga, kinungboi tanurji reprangtsüba sürnung Medembaji tzümar shisatsü aben ama, pai khenü danga tanur asem atema mebilem aser yaritsübo yimdangia maru.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

London nung crusade ka nung nisung 2,000-i Khrista agizük



London nung evangelistic crusade ka nung tangokba noksa nung angur.

London, February 07 (Agencies): Taoba hopta London nung evangelistic crusade ka nung nisung 2,000 jungnüai Yisu Khrista agizükogo.

ExCeL London nung ayongzükba sentong nungji nisung 7,000 dak tali aden. Iba sentong nungji Atlanta nung aliba 2819 Church nung pastor Philip Anthony Mitchell-i sayutsüngia liasü.

2819 Arogoi hopta piyong iba crusade atema renemshia liasü. Hopta ka piyong parnoki London yimti lenmangtem nung sayutsüngia jaja, outreach sentong agi aser pastor Mitchell-i UK nung pastor 60 ajurua liasü.

ExCeL London kishi melapokdangyongi nisung aika tarensena nokdaker liasü.

Iba crusade nung adenertem rongnung ka, Michael-i, "Ni jail nung aliba mapang ni Yisu agizüka liasü. Ni ano temaotsü tali aginüba agi ni iba sentong nung adentsü aru," ta ashi.

Iba sentong nung adener

Isabella-i, "Tanela Temeshi ajanga onok den jembitsü, ta onoki meteta dang liasü," ta metetdaksü.

Lokti den jembidang pastor Mitchell-i, "Ni iba tesem yagi saisapongtsü atema aruba masü saka mapa ka inyakdaksütsü atema Tsüngremi onok yok," ta ashi.

Yihuda kaket nung ajemdaker Mitchell-i telempet malitsü aser sadoksadoka aliba tamanger kaka masütsü ayongzük.

"Na iba takdang telungi aitba ama iba takdang adena metugutsü saka melenshir tugutsü," ta pai metetdakja liasü.

Sentong tatembanglen nisung 2000 jungnüai Khrista agizük aser parnok teimbaka lanurtem liasü.

"Tsüngremi onok den indangindanga jembir ama liasü. Ni taküm melenshir iba tesem toktsür aor," ta Isabella-i ashi.

2025 Stewardship Generosity Report ajanga, UK nung tenla agütsürtem

shilem 80 bo arrshi 18-34 tsüngdapurtem asütsü ta metetdakja liasü, ajioda UK nung pei tamang jenjang bushirtem teimbaka lanurtem lir.

Yaküm UK tesem balala nung Laishiba aika yokogo aser Laishiba alirtem rongnung tang mezüng Laishiba alirtem aser lanurtem aika liasü.

Quiet Revival report ajanga-a, UK tesem balala nung aliba University campus tem aser mapa inyakba tesemtem nung sarasadem sentongtem, Bible studies aser Khrista agizüka baptiba kanga bulua kümdar, ta metetdakja liasü.

Crusade sentong nung Mitchell-i Arogotem danga, "Nüburtem ayar. Alu arühtsü atema alu jenti mena lir. Tsüngremi agütsüba maongka ya agitsü atema Arogotemi saaksalemtsü asü?" ta ayongzüka liasü.

Pai aniba Arogoi taruba crusade ji New York nung agitsü.

Tsüngrem mezügmeshiba ken o nung Khristan nurse ana maitsü

February 06, 2026: 2021 küm Pakistan nung Khristan nurse anati Tsüngrem mezügmeshi, ta tena nem tai tongloktsüba sülen tena küm pezü jungnüa atsüka liasü, ajisüaka court kati iba ken o nung tena maitsüi obendang agütsüogo.

Nurse Mariam Lal aser student nurse Navish Arooj na 2021 küm April 9 nü pua liasü aser Pakistan nung Tsüngrem mezügmeshiba ozüng kübok tena anema ken o benoka liasü. Iba ken o nung aibelenertem taküm piyong tepuokdak ayur mesüra tasüba temerenshia agütsür.

Faisalabad nung aliba Civil Hospital nung Muslim nunger kati, Khristan nurse ana jagi Islam yimsü dak sendakba noksa ka hospital

notice board nungi shizüka indoktsü, ta tena nem tai tonglokja liasü.

Tena ita pongu pua ayuba sülen bail nung chiok, ajisüaka tenati tetsübu nung küm pezü jungnüa atsüka dang liasü.

Yaküm November 29 nü Faisalabad Additional Sessions Judge, Muzaffar Ali Anjum-i iba ken o nung tena maitsüi obendang agüja liasü saka tena taküm lendong nung aliba agi iba obendangji tawa ang sangdonga liasü.

Tena anema kuli tejangja maliasü, ta Khristan temeden atema inyakba telok National Commission for Justice and Peace (NCJP) nungi Behram Francis-i metetdaksü.

NCJP Faisalabad nung director, putir Khalid

Rasheed Aasi-i, "Pakistan nungbo Tsüngrem mezügmeshiba ken otem nung trial courts-i tai tonglokja alirtem maitsütsü atema arendaker, kechiyong parnokia amokmeren ajangshir. Ibayongji aiben parnoki item ama ken oji temaba court nung benoktsü tuyur," ta metetdaksü.

Osangbener den jembidang Aasi-i, "Iba ken o nung district court kati kanga tasü itta iba ama obendang agütsüogo, aser iba ya tatitshitsü tajung ka asütsü imlar," ta metetdaksü.

Tang alima nung Khristantem alitsü linük tamajungtiba 50 rongnung Pakistan ya jenjang 8buba nung lir (Open Doors' 2026 World Watch List).

ANOGO ABEN TSÜNGREM DEN

KIBONG NUNG TELUNGJEM

Ajiang, adianutem külemi telungjem mung alitsü koda tajung aser jangratemtsü lir.
~ **T. Ken 133:1.**

Kibong ka meimtepa tesünep alitsü sabiji telungjem ya lir. Laishibai ashir "adianutem külemi telungjem nung alitsü koda tajung aser jangratemtsü lir." Lungjema lira ta asüba kibong nung obang mapu malia ta meshitet. Lungjema aliba kibong nung tebilemba aser obang mapuyonga kadi ka angateter, agizükteter, akümtsübur, aser temeim nung nungitteper.

Efesa 4:2,3 nung yamai ashir "Ajemaluba aser tesüngjem agi, aremzükba agi, temeim nung kadi ka den azüzüktepang. Tanela telungjem wazüka yutettsü asoshi tesünep ajanga alentepdaksütsü." Telungjem atema ajemalu, tila akümba, taremzük aser timtem mapang nung yimjung ayutsü bendanga agütsütsüla.

Khristan kibong ka nung telungjemji Yisü jakla ama temeim mezüng südaktsür, tatok agütsür, aser kadi ka angatetdaksür. Kibong külemi sarasademba, satoksatoka jembia lemsatepba, yakta tatok agütsüba aser Tsüngrem temeimi ka küma alentepbaji kanga metsünga reta benshitsüla.

Kechi agi kibong telungjem raksatsü iba tasa, mapa aser tashi ajakji samatsüla.

SARASADEM:

Kecha tashi agia ozü kibong meraksatsü onok mapang ajak nung Ne dak atsüoker lungjema lidi. Amen.

Khristantem dang Iran atema asemnü sarasademtsü mepishi

February 07, 2026: World Iranian Christian Alliance (WICA)-i alima tesem balala nung Arogotem dang Iran atema anogo asemnü sarasademjang, ta mepishiba ama aikati sarasademtsüdar.

US aser Iran na tsüngda Oman nung senden ka ayongzüka amentsü sentong lia WICA-i Khristantem dang sarasademjang, ta mepishi.

Tawa Iran nung nüburtemi yimsüsürtem anema longkak aitba mapang nung longkak aiter 30,000 dak tali tepsetogo.

Anogo asemnü Iran atema lumia sarasademtsüba den külemi Khristantemi special Day of Remembrance-a amongtsü imlar, ta WICA-i metetdaksü.

Hokolbarnü (February 6) Iran linük aser reshikangshirtem atema sarasademtsü, Honibarnü (February 7) Iran nung tenzüker Khristantem atema sarasademtsü aser Amongnü Iran nung Arogo atema sarasademtsütsü.

Iran nunger Khristan lawyer ka, Attieh Fard-i, "Iran nunger atema sarasademtsütsüji kanga tongtibang. Mapang kaka nung nüktzü ayimer, mapang kaka nung tsübur aser mapang kaka nung anibelemer aser jashir. Ozü medemertem ajaki ibaji ajangshir. Khenkhenbo onok mangpua saaker, khenkhenbo amoui mouteter aser shirnoksa tepsetar ajaki meteta dang lir," ta ashi.

Nütsüng million 85 aliba Iran linük nung nütsüng shilem 1 dang Khristantem lir.

Ajisüaka Exeter University nung International Relations professor aser Bristol Baptist College nung research associate, John Heathershaw-ibo, "Tang Iran nung Khristan nütsüng kanga kera arener. Khristan nütsüng arentsü atema yimsüsürtem/sorkar melentsü menüngdak. Tarutsü atema teimlaji sorkar dak keta mali," ta metetdaksü.

Paisa, "Atangji tang aliba yimsüsürtem ya majung. Shidi sürbo yimsüsürtem ya atsüngdok nungbo ibaji tajungba asütsü," ta metetdaksü.

AO OSHI ANGAZÜKDAK:**TANÜ ANGAZÜKTSÜBA OJANG****Tzüma**

(n) tzü tema (surface of water)

* Tzüma nung rong jajar.


Tzümalen

(n) tzü yima alulen lenden lima (plain area where big river is formed)

* Tzümalen nungi dang asenok chiyongtsü ajak bener atur.



Tir Yimyim

OLONG PAITEP # 7408**TIPIEN**

2. Sü jeplok

- (4)

4. O agi merenshi

- (5)

7. Ayongküm li

- (5)

8. Chiyongtsü mapang süiadok

- (4)

9. Tsüngrem den jembiba

- (9)

12. Saklok

- (4)

14. Samaba mebushitet

- (5)

15. Mejanga onü

- (5)

16. Tzü shiruru ka

- (4)

LANGTSÜNGLEN

1. _____ i - (4)

3. Kasa masü - (6)

5. Nüchi masü - (5)

6. Tashi endok - (5)

9. Langtem - (5)

10. Anü malidang - (6)

11. _____ kibur - (5)

13. Tebur tembar tsüngda jatepba - (4)

OLONG PAITEP # 7407 TELANGZÜBA**TIPIEN :**

1. Kija, 3. Yangi, 4. Alemlü, 6. Tazüng, 8. Ainer, 9. Maka, 10. Tain, 11. Ozü, 12. Apet, 14. Naro, 16. Anogo, 17. Nisung, 18. Anük, 19. Tesep, 20. Sapu.

LANGTSÜNGLEN :

2. Jilia, 3. Yiar, 5. Mak,

6. Temzüng, 7. Nai, 13. Pei,

14. Ngaja, 15. Aon, 16. Anep.

**ALOKBA O SAYUTSÜNGIR NA AJURUTEP :****Alokba** : O Tesayur, nenoki teti sayutsüngir aser nenok o dang anga arur, saka tanübo ni nenok dang o kar shinür.**Tesayur** : Kechiba mashitsü odia dang shiangma, kechi shinür ? Alokba!**Alokba** : Nenok sapangi aturtemi tetia ken atentsü ashidang kenzüngdangba paikaji ta dang ashir masü saka aikati kenzüngdangba number ta ashir, ano lapoka lira nokdaker tendi ta ashir, süra lapoka melira matentsü asü? ano tongtipang kaji asenoki teti zünga aliba lai kadang, ajaki meteta aliba lai tejen ka dang ta ashir, mena alirtem jagi tetibo mazüngba lai aser memeteti aliba lai tasen nungdaka mali, laishibaji kwiben azünger paibenji tasen akümer ta nenoksa ashir masü na? Anungji o talila jemipia mapang indoka mejembi tajungba asütsü, ano aika lir saka tanüba ojangdang shidi.**Tesayur** : O Alokba kanga pelsrano!!

~~Lilir : I. Kilang Ajem, Indisen Dimapur.

Manipur Cabinet-i Panchayat election takaratiba nung agitsü lemtet

Manipur Chief Minister Y. Khemchand

Imphal, Tsüklai/February 7 (Agencies): President's Rule (PR) mapang Manipur High Court-i tetuyuba agütsüba sülen anidaka State Cabinet-i Panchayat elections takaratiba nung agitsü telemtetba agiogo. HC-i election ya ita trok tsüngda agitsü tetuyuba agüja liasü.

Chief Minister Y. Khemchand lenisüba nung cabinet senden tanabuba ya Hokolbar nikongtsütsü Chief Minister indang Secretariat nung mena liasü.

Iba senden nung Deputy Chief Minister Losii Dikho, Cabinet Ministers Govindas Konthoujam aser Khuraijam Loken, aser Chief Secretary Puneet Kumar Goel nungera dena liasü. Kuki nung lenir

Deputy Chief Minister Nemcha Kipgen iba senden nung virtually dena liasü.

Manipur High Court-i August 29 nü Tir-i yimsü asüba Manipur sorkar dang ita trok tsüngda Panchayat elections agitsü tetuyuba agüja liasü. Iba tetuyuba ya Chief Justice Kempaiah Somashekar aser Justice Guneshwar Sharma nati tentetba division bench kati ken o angadanga mapang agüja liasü. State nung Panchayat elections ya tatemsa 2017 küm agia liasü.

Manipur nung 6buba Panchayats general election ya 2023 küm June ita agitsü lateter liasü, saka state nung tensa mejungi akümba ajanga magitet.

Congress lenir aser Manipur nungi Lok Sabha züngsem Bimol Akoijam-i ken o ashishiba sülen state cabinet-i iba telemtetba ya agia liasü. Akoijam-i state nung Panchayat election menoa magiba kuli asüngdanga liasü.

Paisa, election agitsü atema sorkari kecha jenjang agir magi ta asüngdang. Iba den bendenloksema election mapang shitak nung magitetsüsa tetsükdaktsütem aliba bentettsü asoshi sorkar sentong kecha ali mali ta ashishi.

Bimol Akoijam-i ken o ashishiba langzüba mapang Union Minister of State for Panchayati Raj, S. P. Singh Baghel-i Lok Sabha dang ashiba agi, Manipur nung Panchayat elections ya administrative ken o balala, okadak ken o, litigation, Panchayat tem delimitation aser menden mekazüka yutsüba dak sendakba nung ken o aliba ajanga menomeyanger ta ashi. Item ken o tem ya state sorkar tawabangba kübok lir.

Karbi Anglong Administration-i bendanger asem mintok**Guwahati, Tsüklai/February 7 (Agencies):** Karbi Anglong district administration-i Foreigners' Tribunal (FT)-i bendanger ta sangdongba nisung asem mintoktsü tetuyuba agütsüogo. Osang agütsüba sülen ghonda 24 tsüngda Assam aser India toktsür aotsü asoshi ketdangsürtemi parnok nem tetuyuba agütsüogo.

District Commissioner-i Immigrants (Expulsion from Assam) Act, 1950 kübok Section 2 dak ajemdaker February 2 nü iba tetuyuba agüja liasü. Tribunal-i nisung asem ya bendanger ta kuli agütsüba sülen iba jenjang ya agogo.

Mintokertem rongnung Manja Police Station kübok Manja Nadipar yimtsüng nungi Md. Faizul Haque, Manja Police Station küboksa Hidim Teron Basti nungi Md. Rafiqul Ali aser

Bokajan Police Station kübok Jadav Rai Grant nungi Md. Fakaruddin nung densema lir.

Tetuyuba nung ketdangsürtemi parnok asem dang ghonda 24 tsüngda Assam aser linük toktsür aotsü tetuyuba agütsüogo. Parnok ya Dhubri, Sribhumi, mesüra South Salmara-Mankachar district tem ajanga aotsüla.

Kasa mapang nung district administration-i, department balala dang iba tetuyuba sülen tashi anga anidaktsü tetuyuba agütsüogo. Ketdangsürtem dang parnok indang ki o jen ajak sota ayutsü tetuyuba agütsüogo.

Iba den bendenloksema ketdangsürtemi parnok tenüng ya electoral roll nungi agintsüla. Parnokisa, ration card aser Aadhaar card thitsütsüla. Maneni

administration-i parnok ya sorkar welfare scheme aser

social security benefit ajak nungi agintsütsü.

District ketdangsürtemi ken o dak sendaka aliba department tem dang tetuyuba ya memenoi benoka inyaktsü metetdaktsüogo. Parnoki compliance report ya district administration nem agütsütsüla.

Assam sorkari tang Foreigners' Tribunal-i obendang agütsüba benoka inyaktsü merangba nung shilem ka ama iba jejang ya agiogo. State sorkari district administrations ajak dang Immigrants (Expulsion from Assam) Act, 1950 kübok takaratiba nung jenjang agitsü tetuyuba agütsüogo.

Ita tsüngda district aika nungi bendangertem mintokogo. Ken o aika nung ketdangsürtemi parnok ya ghonda 24 tsüngda latetja aliba lenmang ajanga aotsü tuyuogo.

Tinsukia nung kaketshir ka tesayuri züka merenshiba sülen asü**Digboi, Tsüklai/February 7 (Agencies):** Arishi küm 14 tain Sankardev Shishu Niketan shiba tesayur kati azükba sülen yirua liasü, pa Honibarnü (February 7, 2026) Assam Medical College and Hospital (AMCH), Dibrugarh nung temang anepalua aliba mapang süogo.

Source temi ashiba agi, iba tatalokba ya Brehostibarnü Assam nung Tinsukia district kübok Philobari nung school ka nung ataloka liasü. Iba kaketshir ya tesayur ka tenüng agi Sanjib Sharma-i züka merenshia liasü. Iba sülen kaketshirsang temang tamajungba küma ao. Shishu temang anepaluba

sülen AMCH, Dibrugarh-i anir aotsü tetuyuba agütsü, kong pa temang tajungba anepalutsü atema admit süa liasü. Medical tsütsü nungi takokba tashi teyari agüjaka pa Honibar anepdang asü.

Iba ya atalokba sülen district ajunga nung nüburtemi ola adok tenzükogo aser kaketshir lokti tentet, lokti tentet balalai iba tatalokba ya aitsüogo.

TMPK Tinsukia District Committee-i iba tanobusang asüba osang angazüka kanga aoksaba lemsatepogo. TMPK-i sangdong ka ajanga ashiba agi, tesayur kati tanur ka anema jenjang agiba ya agizüksü makok aser iba ya

tanurtem temeden anema lir.

TMPK-i, mapang atakzüka yur tebandang makai bushisüngdangtsü takhangba agütsüba den aibelena alir nem tapet temerenshi agütsütsü ayongzükogo.

"School ya tanurtem atema teküzmükba tesem ka asütsüla. Iba amala tatalokba yagi rijutem nung inyakyimtem indang tasüngdangba aika adoker," ta kasa sangdong ajanga metetdaktsü.

Kasa mapang nung police source temi ashiba agi, iba lendong ya kodaser atalok aji jangjatsü atema bushisüngdang südar aser osang tejangja atadar.

MULUNGZEN O



15-08-1947 to 02-02-2026

"Kibuba matsüngdang Pa temeshipur asüba senti lir" - T. Ken 116:15

Asür **TEMSÜENLA** (Yaongyimsen) mapang tatsüka shirangdang aser iba lima doktsür aodang tembar, kiyonger, kinunger, temeimertem, Arogo, Lokti balalai tamang sarasadem, shisatsü, mapa, rongsen, mapang jendi agi yaria ozü khuret pongbatsüa mulung süneptsüogo, nenok ajak dang kangasa pelar. Nenok temeim mapatem teti ozüi temulung nung rizünga ayutsü. Tsüngremi nenok ajak tali moajangma.

Asür ozü tsürabur ya temeim agi sünga aliba aser tangar dak aria bilemba tetsü ka liasü. La shisa taka, tesüngjem, ajemalu yimya aser Tsüngrem dak tsüngchia amangba taküm koba la meimertemi menungraseta bilemtetter. La onok mulung nung teti alitsü.

~ Temeim Chirnurtem, Semchirtem aser Kinungertem.

MOLUNGZEN O



Asür Temjensoba

24.06.1969 - 02.02.2026

Temulung retreta onoki teti meima aliba asür **TEMJENSOBA** mapang talang ka shiranga lir asüba lemsateper. Pa manemi aliba mapang shirnokisa nübu, shisatsü aser sarasadem agi onok nongita yariogo nenok ajak dang kanga pelar.

Nenok sarasadem, mulungso tenla aser aria bilema arua asükhü lemsatepba ajanga mangyim jashi tia nung aliba mapang onok nem tashi aser anisüngzüka agütsüogo. Nenok mapa tajung teti bilemtettsü. Nenok ajak dang kanga pelar.

~ Temeimbatem.

Venezuela nung tepuokertem chioktsü anogo atakzüksü

Caracas, Tsüklai/February 7 (Agencies): Venezuela National Assembly tir Jorge Rodriguez-i sangdong ka ajanga, pai aniba sorkari February 13 nü tashi nungbo yimden yimsüsüba dak sendakba nung tepuokdaki yoker ajak chioktsü sentong lir ta ashi.

Taoba tir Nicolas Maduro kübok miemchir temeden anema inyaksangshia aliba bentettsü atema Hokolbarnü sangdongba osang ya togtibang jenjang ka agiba ama agizüker.

Ajisüaka ken o ashishirtemi Venezuela sorkari nangzüka ya mataloktsütsü akok, kechiyong sorkar ya maneni Maduro den kanga junga sendaka aliba lenirtemi anir.

Linük yimtiba Caracas nung yimden yimsüsüba dak sendakba nung tepuokdaki yoker alir kinungertem den sensaksemba mapang Rodriguez-i parnok ajak chioktsü atema anogo ka atakzüksüogo.

"Taruba Mongolbar aser temenotiba agi Hokolbar na tsüngda parnok ajak chioktsü," ta interim tir Delcy Rodriguez adianu Rodriguez-i Zona 7 detention centre kima nokdaker ojembiba mapang ashi.

Paisa, Chavismo movement mapang aibelen ajak sorkari yanglushitsü merangtsü, ta ashi. Iba inyakyim ya tir Hugo Chavez mapang tenzük aser Maduro lenisüba nung maneni benoka inyaka liasü.

National Assembly nung amnesty bill ka atema mezüngbuba vote agibabo züngsemtem ajaki mulunga agizükba sülen pai iba olen ya lemsatepa liasü.

Yimden yimsüsüba dak sendakba nung tangar party pusemba mesüra sorkar anema longkak aitba atema aija tepuokdak yua alibatam chioktsü asoshi iba ozüng ya yangluba lir. Maduro lenisüba kübok, pai aniba sorkar anemertem ya linük anemertem, kiralongrartem mesüra

tesempatep adokdaktsütsü prokshitem ta shia aija liasü.

Iba bill yagi Nobel Prize winner Maria Corina Machado nem election nung metokteptsü atema tenokdangba agütsür aliba agintsütsü.

Ajisüaka iba inyakyim yagi nisung tepsetertem, meimchir temeden anema inyaksangshirtem mesüra ochi mashi inyakyim nung aija alirtem mayimjemsü.

Bill dak sendakba nung tanabuba aser tatembangbuba vote ya Mongolbarnü agitsü. Rodriguez-i ashiba agi bill nung sign asüba sülen tepuokertem chiok tenzüksü.

"Ozüng agizükba sülen kasa anogo parnok chioktsü," ta pai Hokolbarnü ashi.

Yimden yimsüsüba tsütsü parnok anemertem tepuokdak ayuba, rishikangshiba aser tepsetba atema Maduro sorkar ya aija aruogo.

Ajisüaka January 3 nü United States tir Donald Trump-i Maduro aser pa kinungsü Cilia Flores na aputsü atema military operation ka benoka inyaksü asoshi temelaba agütsü aser tena ya temesepba mozü shibelenba dak sendakba nung obendangtsü asoshi New York-i anir oa liasü.

Iba sülen Trump administration-i interim tir Delcy Rodriguez dang parnok takhangba ataloktsütsü nongshia arudar, kong Venezuela indang totzü ayoktsüba aser extraction densema lir.

Administration ketdangsürtemisa meimchi temeden anema inyaksangshiba atema Maduro-i aniba sorkar aiben aija arudar. Iba hopta tepuokertem chioktsüba den amnesty ozüng agizüksü aliba ya Trump White House atema takok ka ama züngshitsü.

Ajisüaka meimchir temeden dak sendakba nung tenangzükbatem benoka inyaksü minyaksü aser sorkar kübok aibelenertem nem ochi obendang agütsütsü magütsütsü mejangja.

Venezuela sorkari ashiba agi, parnoki tepuoker 900 bo chiokatokogo.

Ajisüaka human rights telok Foro Penal nung amala lokti tentetemi tepuokertem 383 dang chiok ta shia arudar. Foro Penal-isa, yimden yimsüsüba dak sendakba nung ano tepuokdak nisung 680 yua lir ta asatetogo.

Maneni tepuok dak nungi chiokertem nem ola madoktsü atema tetuyuba agütsüogo aser iba ajanga parnok apuba aser sota ayuba indang parnoki mejembiteter.

Iba hopta tetenzüklen Amnesty International-i ashiba agi, osangbener 14 apu aser Maduro apuba sülen chioka liasü. Kasa mapang nung tangartemia sorkar den sendaka aliba tashitemi parnok amokmerenba osang agütsüogo.


Maneni parnokisa Maduro kübok inyakertertem office nung ali tashi nungbo Venezuelan temzüng ozüng ajanga o sadem sadema jembitsü memelar aser yimden yimsüsüba tsütsü inyakyimtem sadem sadema benoka minyakteter, ta ashi.

Amnesty International-i, amnesty bill aser tanga inyakyimtem ajak pelashishia agizükba lemsatepogo, saka taoba mapang ozüng alema inyaksangshirtemi iba amala inyakyim maneni benoka inyaksü minyaksü ajibo meshitettsü, ta ashi.

"Maduro aginba ajanga meimchir temden anema inyaksangshiba manener," ta iba telok secretary-general, Agnes Callamard-i ashi.

Callamard-isa, US-i Maduro apuba aitsüogo aser iba ya international temzüng ozüng alema lir ta ashi.

Tepuokertem chiokba den Venezuela sorkarisa El Helicoide tepuokdak shibangtsü sentong aliba sangdongogo. Caracas nung iba tepuokdak ya nüburtem reshikangshia amshiba tesem ka ama züngshir.



United States-i yimjung yanglutsü atema Ukraine aser Russia na nem mapang ka atakzüksüogo, ta Ukrainia tir Volodymyr Zelenskyy-i ashi. Paisa, June ita tashi mapang atakzüksüba nung yimjung meyanglutetra US-i linük anaprongla tali nongshitsü akok, ta ashi.

AMAM 9 buba Auto X & Moto X sentong tembangogo



Mokokchung, 7th Feb (TYO): Adventure and Motorsports Association Mokokchung (AMAM)-i ayonga 9 buba Auto X & Moto X 2026 sentong Feb 5 nungi tenzüka anogo asemnü Imkongmeren Sports Complex, Mokokchung nung kaogo. Iba sentong nung north-east state

balala nungi motorsports meimertem adenshia shilem agia denogo.

Auto X nung tetoktepba telemsa asem - Open Category, Below 1300cc aser SUV liasü. Moto X nung telemsa ana - Beginner aser Open Category. Iba den külemi North-East Championship ta sür tetoktepba round

ka agia liasü.

Tetoktepba telemsa balala nung takokertem nem senpet trophy, certificate aser sen agütsü. Iba sentong shibangba aser senpet agütsüba sentong nung MLA & Advisor, Social Welfare, Govt. of Nagaland, Wangpang Konyak tongti tesemdang liasü.

Takok angurtem teküboklen agütsür:

1. Auto X

Jenang	Tenüng	Telemsa	Best runtime
1st	Ruokuobeituo (KAMC)	Open category	2:28.10
2nd	Thezieu Kire (KAMC)	Open category	2:32.91
3rd	Chumdemo (Spearhead)	Open category	2:33.81
4th	AtobaLongkumer (Spearhead)	Open category	2:34.44
5th	Kima Jamir (Spearhead)	Open category	2:35.47
1st	Thezieu Kire (KAMC)	Below 1300cc	2:31.72
2nd	Ruokuobeituo (KAMC)	Below 1300cc	2:33.41
3rd	Chumdemo (Spearhead)	Below 1300cc	2:34.6
1st	Kima Jamir (Spearhead)	SUV category	2:41.06
2nd	Ruokuobeituo (KAMC)	SUV category	2:41.22
3rd	Akho Phom (Spearhead)	SUV category	2:42.50

2. Moto X

Jenang	Tenüng	Telemsa
1st	HUKHOTO CHUZHÖ	Open category
2nd	BEDUKHO RHAKHO	Open Category
3rd	NEITHOSER SOUKHRIE	Open Category
1st	KHRUZOTO KHESOH	Beginner
2nd	KHRISHNA SHARMA	Beginner
3rd	LHOUSIVILIE	Beginner

3. Northeast Championship:

Jenang	Tenüng
1st	Ruokuobeituo (KAMC)
2nd	Thezieu Kire (KAMC)
3rd	Chumdemo (Spearhead)
4.	Fastest driver: Ruokuobeituo (KAMC)
5.	Best Participating Team: Spearhead.

T20 World Cup: Pakistan-i wicket 3 agi Netherlands kokogo

Tsüklai/February 7, 2026 (Agencies): Honibarnü T20 World Cup tenzüker mezügbuba asaya nung Faheem Ashraf-i ball 11 nung run 29 yanguba ajanga Pakistan-i tera agi dang Netherlands koka liasü.

Asaya akoktsü atema run 148 arishiba mapang Pakistan team-i mapang ka nung asayar ana out ser run 98 yanglur aliba nungi asayar 7 out ser run 114 dang yanglur liasü.

Netherlands nunger bowler temi ball kanga junga ona Pakistan team nem run meyangludaktsü aser tatembangbuba over ana nung asaya akoktsü asoshi run 29 nüngdaka aküm aser Ashraf-i kanga junga asayaba ajanga dang parnoki asaya ya ball asem anunga lia koka liasü.

Pakistan nunger bowler tem rongnung Salman Mirza-i ball kanga junga ona pai run 24 agütsür wicket 3 agi. Netherlands pur asoshi captain Scott Edwards-i run (37) timtiba yanglua liasü.

Sinhalese Sports Club nung mezüng bat asütsü maongka anguba sülen Netherlands-i asaya kanga junga tenzük aser opener Michael Levitt-i ball 15 nung run 24 yanglu.

Iba sülen Bas de Leede-ia ball 25 nung run 30 yanglu aser De Leede o Edwards na batting mena aliba mapang Netherlands puri asayar 3 out ser run 105 yanglur liasü.

Ajisiaka iba sülen parnoki run 20 dang yanglur aayar trok out süatok. Mohammad Nawaz, Abrar Ahmed aser Saim Ayub

nungeri wicket anana agia liasü.

Pakistan pur batting amenba mapang Sahibzada Farhan-i ball 31 nung run 47 yanglua asaya kanga junga tenzüksü, saka Roelof van der Merwe aser Paul van Meekeren nati ball kanga junga aoba sülen Pakistan nungi asayartem kanga kara out asü tenzük.

Ajisiaka over 19buba nung Ashraf-i Logan van Beek indang over nung six asem den four ka azükba ajanga team jenjang junga kümdaktsü aser maksütsü nungi kümzüka asaya koka liasü.

Tatembangbuba over nung asaya akoktsü atema run pongu nüngdaka asayaba mapang Ashraf-i De Leede-i aonba ball ka cover ajanga four ka züktok aser iba sülen ball asem anunga lia asaya koka liasü.

BCCI-i U-19 WC akokba India team nem sen crore 7.5 agütsütsü



Mumbai, Tsüklai/February 7 (Agencies): Board of Control for Cricket in India-i Honibarnü sangdong ka ajanga, Harare nung Hokolbarnü Under-19 World Cup akokba atema India under-19 team nem senpet sen crore 7.5 agütsütsü ta sangdongogo.

England den final asaya nung arishi küm 14 tain Vaibhav Suryavanshi-i ball 80 nung run 175 yanglua Ayush Mhatre-i aniba India team-i otsütsüsa over 50 nung asayar teku out ser run 411 yangluba nung teyari agüja liasü. Pai six 15 aser four-a 15 züka liasü.

Iba asaya nung England

team-ia over 40.2 nung run 311 yanglu, saka parnoki India team run 100 agi memenepi liasü. India-i tang agi trokbenbuba U-19 World Cup ya kokogo. India team-i iba asayamung ya tesüsa 2022 küm koka liasü.

2022 küm Yash Dhull lenisüba nung Under-19 World Cup akokba mapang asayar ajak nem senpet sen lakh 40 agütsü aser support staff nem lakh 25 agüja liasü. Kasaji India tetsür Under-19 team, shirnoki 2023 aser 2025 küm asayamung kokogo, parnok nema BCCI-i senpet sen crore 5 agüja liasü.

Iba asayamung kokaka India nunger asayartem International Cricket Council nungi senpet kecha mangu, kechiyong ICC-i Under-19 World Cup ya developmental tournament ka ama agizüker, koba commercial tetoktepba ka ama masü saka lanurtem anitetsü nükjidong nung ayongzüka asayar.

Iba inyakyim nung shilem ka ama team tem nem ICC indang development program tem ajanga senotsü teyari agütsüogo, aser iba asaya achaayangba lokti tentet yagi asayamung nung takok anguba atema senpet balaka mejeta magütsür.

U-19 Boys Selection Trials ayonger

Dimapur, Tsüklai/February 7 (TYO): 6buba asür G. Rio Memorial Inter-District Cricket Tournament (Dimapur District atema) asoshi U-19 Boys Selection Trials Hokolbar aser Honibar; February 13 aser 14 nü 3 ako nungi tenzüka DDSC Ground, Golaghat Road, Dimapur nung agitsü, ta Dimapur District Cricket Association sangdong ka ajanga metetdaktsüogo.

Iba asayamung asayatsü atema asayartem ya 2007 küm August ita 1 nü mesüra iba sülen asortem asütsüla.

Kasa mapang nung U-16 Inter-School/Club Cricket Tour-

nament 2026 atema U-16 Boys Registrations sentonga kasa anogo, tesem aser mapang nung agitsü.

U-16 team atema asayar kaji 01/09/2010 aser 31/08/2012 tsünga asortem asütsüla.

Asayartem ajak ket nung Date of Birth certificate aser adhaar Card alitsüla, ta kasa sangdong ajangasa metetdaktsü.

Ken o dak sendakba nung osang tejangjaba agitsü atema Vinoto Awomi (8257019330) aser Kiton Magh (9362790744) na den agüja aliba phone number ajanga tongteprateptsü DCA-isa metetdaktsüogo.

James Minnesota United nung denogo

Tsüklai/February 7, 2026 (Agencies): Colombia nunger nüngtugu football asayar James Rodriguez-i 2026 World Cup masaya tsünga MLS club Minnesota United den mapang tatsüka atema tenangzüktepba ka yangluogo, ta club sangdong ka ajanga metetdaktsü.

Arishi küm 34 tain taoba mapang Real Madrid midfielder, shiba tatemsa Mexico club Leon nungi asayaogo, pa June ita tashi asayatsü aser tenangzüktepba ya December ita tashi yanglushitsü asoshi lenmang sadema lapoka yuogo.

"Kü taküm nung tapak tasen ka lapoktsü atema pela bilemer," ta Rodriguez-i ashi.

"Ni takokba tashi tajungtiba asayatetsü imlar, ajita asünung dang ni yimti aser kü dak tamang akba nüburttem ajak nem tepela bener arutsütetsü," ta taoba mapang Bayern



James Minnesota

Munich nungi asayar yagi ashi. "Ni bendanga agüja pusemba Minnesota fan tem den ajuruteptsü yongya atar, kechiyong nia bendanga agüja asayaba asayar ka lir shibai teti dang kokner," ta pai ashi.

Minnesota pur ya taoba season Western Conference nung pezübuba nung tembanga liasü. Parnoki asaya 10 akok aser asaya 8 makokba den asaya 10 draw süa liasü.

BILEMDANGANG

"Na tajungba maküm tashi takokba tashi tajungba agüja inyangang."